

# INUIT ATAQATIGIIT

## Inatsisartuni



UKA 2018/25  
12.10.18  
Múte Bourup Egede

**Uunga siunnersuut: Sermip erngullu niuernikkut iluaqutigineqarnissaat pillugu Inatsisartut inatsisaat nr. xx, xx. xxx 2018-imeersoq.**

**(Inuussutissarsiornermut Nukissiuuteqarnermullu Naalakkersuisoq)**

Inuit Ataqatigiit nunatta pissarititaanik atorluaanitsigut nutaamillu eqqarsarnitsigut nunatsinni aningaasarsiornermi siuariartornissarput pingaarluinnartutut isigaat. Siuariartornitsigummi atugarissaarnerput attallugulu ineriartortitsittuarnissaanut aqutissiuussisinnaagatta. Nukiit pigereerpagut – assigiinngissuserput uniffiginagu ataatsimoorfigut nukigalugit suleqatigiiffiginiartigit.

Nunatsinni imeq sermerlu nungussaangiusattumik pigaagut ukiorpassuannortunilu aningaasarsiorfissatsialattut oqallisigiuarlugit. Nunarsuatsinni imermik pisariaqartitsineq qaffakkiartuinnarpoq, taamaattuarallassasorlu siulittuutigineqartarluni. Nunarsuarmi ineriartorneq taamak ikkaluartoq, nunatsinni imermik sermimillu tunisassiorneq iluatsilluarsimasutut oqaatigineqarsinnaangilaq. Piffissanngorporlu tamassuma illuatungaanut saatsinnissaa.

Ingerlariaqqittariaqalerpugut, nunatta tunniussinnaasai ataatsimoorfigisagut inuussutissarsiutinillu pioreersunik kalluaanngikkaluarluta inerisaanissamut aqutissiuussinissarput piffissanngorpoq. Periarfissagut tamakkiinerusumik atortariaqalerpugut maannamiillu siammasinnerusumik eqqarsarluta inuiaqatigiittut ataatsimoorluta immitsinnut, inuussutissarsiutitigit aningaasarsiornitsigullu kivitseqatigiittariaqalerpugut.

Aporfiit ineriartornissatsinnut killilersuisut suleriutsillu eqartumik ingerlanneqartut nunami maani innuttaasunut inuussutissarsiorortatsinnullu atugassarititagut oqallisigiinnarnagittaaq iliuuseqarfigisariaqalerpugut. Namminiilivinnissarpummi siunnerfigaarput angutserneranilu uatsinnut aporfiusut isigisagut aporfijunnaarsillugit aqutissiuusseqatigiittariaqarpugut. Kissaatigaarpullu inatsisissap sammisatta atuisunut allaffissorpallaarfiusumik misigineqarani eqaallisaanermik periarfissiinermillu misigiffigissagaat.

Inuit Ataqatigiit oqaatigissavarput Naalakkersuisut uani siunnersuummini siuariatortitsinissamut aporfiusinnaasunillu aaqqiissutaasinnaasunik siunnerfeqartut nalileratsigit. Ilaatigummi Naalakkersuisut erngup sermillu tunisassiarineqarnialernarani akitsuutinik artukkiisinnaasunik aallaqqaataaniit piumasaqassaarnissaq siunnersuummi ilanngussimammassuk, tamannalu tusarniaanermi aamma kissaatigineqarluni eqqaaneqarsimasoq takuneqarsinnaavoq.

Inuit Ataqatigiit erngup sermillu tunisassiarilluarneqalernissaanik neriuuteqarluarpugut aqutissiuusseqataajumaarlutalu. Nunatsinnimmi aningaasarsiornitsigut suliffissaqartitsiniarnitsigullu siuariartorniarutta nunatta pissarititai atorluarnerusariaqarpagut niuerutigalugillu. Taamaaliorniaruttalu imermik sermimillu tunisassiorneq maannamiit pimoorussaanagerusumik aporfeqartitsinermiillu inuussutissarsiortunut sulisartunullu periarfissagissaarnerulernissamut aqutissiuussiffigissallugu.

Inuit Ataqatigiit taamak oqaaseqarluta Naalakkersuisut siunnersuutaat ilalerparput aappassaaneerneqartiganili Inuussutissarsiornermut Aatsitassanullu Ataatsimiitsitaliami sukumiisumik suliarineqaqqaarnissaa inassutigalutigu. Ataatsimiitsitaliallu sulinermini inuussutissarsiortut susassaqtullu allat akuutilluassagaat aamma kissaatigalutigu.